



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 8

Lavrov-i North Korea semdanga tesendaktep akangshir

Hazard-i asaya nungi anentsü telemtetba agiba kuli agütsü



VOL. XXI NO. 13 (ADOK 13) DIMAPUR ROGONÜ (FRIDAY) MONGPUTENI (OCTOBER) 20, 2023 ₹ 5.00

NU nung tentet balalai longkak aitba athir

Kohima, Mongputeni/Oct. 19 (TYO): Nagaland University, Meriema Campus indang Pro-Vice Chancellor (PVC) merenshiba dak sendakba nung Nagaland University Teachers Association-Kohima, Nagaland University Non-Teaching Staff Association-Kohima, Nagaland University Students' Union Kohima aser Nagaland University Research Scholars Forum-Kohima akhangba ama Nagaland University ketdangsür aser district administration ajanga mera agiba mechi longkak aita aliba thiogo aser akhi ama maparen inyaktüsü, ta tentet pezüi sangdong ka ajanga ashi.

Ajisüaka ketdangsürtem nungi metokmeperi kar danga lira mashi mapang longkak ait tenzüksü, ta parnoki ashi.

Maneni Naga Students' Federation (NSF) nungia sangdong ka ajanga Nagaland University, Meriema Campus indang PVC merenshiba aser amokmerenba khukhua aitsür ta ashi.

Iba tatalokba atema tebilemsü tulu lir, kechiaser iba ya ajanga akumtsüboa aliba academic lenir ka takum lendong nung yutsür aser university telungzük nung arok shilem nung tasüngdangba balala arur, ta NSF tir Medovi Rhi aser tongti zülur Chumben Khuvung nati sangdong ajanga ashi.

Engineering campus tasenbai aoba lenmang yangluba atema bill magütsüba dak

sendakba nung October 16, 2023 nü mangatetep adokba nung sen magütsüadang construction monitring committee kati mapa renemba kuli agütsütsü yimya lir ta parnoki ashiba ya shidak lir.

Iba dak sendakba ken o nung Vice-Chancellor (VC) ajanga tekeratiba nung shilem agütsü nungdakaka VC NU headquarters Lumami dak sübosüyimba yimya ajiteter aser pa nungi telangzüba agütsüba ya mabensa, ta NSF ajanga ashi.

PVC amokmerenba sülen ang Lumami nungi fact-finding committee-i Meriema Campus semdangba ya mapang kanga meshidak lir. Iba ama timtem ya tekeratiba nung tajungtiba len nungi bentetatsü nungdaker, ta parnoki ashi.

NU nung tekolakba ama VC-i pa mapa shidak inyaktüsü aser campus nung alirtem den jembishinü akatsüla aser mapang shidak nung tangatetep kati arutsü asoshi fact-finding committee-i inyaktüsü teimla lir.

Ali kibur indang ken o benjateper aliba MoU nung aliba ama bentetsü asoshi state sorkari tongti shilem agütsü ayongzük, ta NSF ajangasa ashi.

Iba tatalokba ya ajanga university aser nüburttem tsüngta telemsa madokdaksütsüla aser region nung shisaliok aser terenlok asoshi lungjemer kati ka den yimjung nung alitsü ayongzük, ta ashi.

NE nung nükla aliba meteta MPVCD-NER scheme tenzük: Advisor Mhathung



Advisor, Agriculture, Mhathung Yanthan-i FPCs nem tetsüng pezü aliba transportation vehicle (gari) agütsüba sülen tangokba noksa nung angur.

Dimapur, Mongputeni/Oct. 19 (TYO): Mission Organic Value Chain Development for North Eastern Region (MOVCD-NER) kübok state level Farmers Producer Organisation (FPO) senden ka Bresthostibarnü Angh House, Agri Expo, 4th Mile, Chümoukedima nung mena liasü.

Iba sentong nung jembidang Advisor, Agriculture, Mhathung Yanthan-i ashiba agi, Northeast India nung nükla aliba meteta scheme ya semzük.

Iba scheme yagi 'certified organic production' yanglutsü asoshi maongka agütsür aser

'value chain' ajunga yanglutsü atema yarir, ta ashi.

Iba scheme indang nükjidong tejangja memeteti mapa inyaktüsü asoshi FPOs/FPCs tenteta lir aser itemji kar dak alaka aika mapa meinyaki dumogo, ta pai ashi.

Pai FPO tem asendenshitsü aser meshibangtsü ajungshi aser teyari agütsütsü atema department-i lenmang bushitsü ta shia liasü.

Iba ama senden ya küm shia mena FPOs/FPCs tem lungjemdaksütsüla, kechiaser kati ka nungi angazüktsü asoshi iba amala sentong ya sapang tajung asütsü aser aluyimer aser

organic businesses tsüngts 'partnerships' tenzüksü, ta Advisor Mhathung-i ashi.

Sentong tatemi paisa FPCs nem tetsüng pezü aliba transportation vehicle amokja liasü.

Department of Agriculture ka nodal agency ka ama MOVCD-NER schema ya state nung 2015-16 mapang tenzük, ta Joint Director, Agriculture K Renphamo Lotha-i metetdaksü.

Iba scheme ya phase asemo renemogo aser ano district 10 nungi FPCs 15 dak rangloker phase pezü buba tenzüksü inyakteper.

Minister Temjen Imna Along-i Nagaland tarutsü tia yangertsü ayongzük

Kohima, Mongputeni/Oct. 19 (TYO): Tanü Nagaland Minister, Higher Education & Tourism, Temjen Imna Along-i government colleges indang principal tem dang mangdang tajung yur Nagaland tarutsü tia yangertsü aser ajak senteper terenlok asoshi inyaktüsü ayongzüka liasü.

Higher Education Department kübok Government Colleges Principals küm shia amongba mungdang Directorate of Higher Education, Kohima nung alidang, nübu shidak anitetba/yangetetba ajanga dang state aser nüburttem tejakleni aotsü, ta Minister Along-i ashi.

Pai principal aser tesayurtem dang azüngtsü aser zülutsü metetba kisüng masü saka shisaliok abensa aliba lokti ka yangertsü ayongzüka liasü.

Wadang aser nübu tajung aika rongnung tesayurtem ya nüburt atsür arurtem rongnung tematiba lir aser parnok dak lokti, kibong, state aser linük yangertsü asoshi tashi lir, ta pai ashi.

Mapa kar inyaktüsü asoshi rongsen nungdaker aser mapa kar danga yimya ajanga inyaker, anungji nüburttem den sendakteper inyaktüsüla, ta pai principals tem ayongzüka liasü. State nung NAAC

Assessment & Accreditation asoshi takok ngua inyakba atema Kohima Science College Jotsoma, Kohima College, Fazl Ali College Mokokchung, Dimapur Government College aser Patkai Christian College nem tepela temaitsü kulizüng kaket agüja liasü.

Iba mungdang tenzükba sentong nung menden Director, Higher Education, Dr. A. Nshoga liasü aser Additional Director, Dr. K. Nishena Nekha-i pela agizükba o jembia aser Joint Director (Administration), Higher Education, Menuokholie Kire ajanga melepzüng o jembia liasü.

Mokokchung nung nisung tepsetba dak sendakba nung nisung ka pua lir

Dimapur, Mongputeni/Oct. 19 (TYO): Chuchuyimpang village kübok Metsuben Farm nung prangbong akhaba osang ka October 17, 2023 nikongdang 4:33 ako meta angazükba sülen Mokokchung Police Station-I nung aliba police tem iba tesemi arrsanga ao. Iba tesem oa atongdang ango tzübo ka anasa nisung tasümgang ka liasü aser pa teko abelen prangbong agi khar liasü, ta Addl. Superintendent of Police & PRO, Mokokchung sangdong ka ajanga ashi.

Iba sülen asüngdangyaba mapang sür alidang ya anogo ana jakdang nungi yi jemer par kinunger den raratepa aru ta angazük. Kinungersang yagi tasümgang yimya majungba asoshi sayutsüngidaksütsü asoshi farm kibur dang ashi, saka tasümgang ya nok ka bener arua parnok den rarapangsen tenzük ta tenük kuli alirtemi ashi.

Iba yongji farm kiburi par farm house nung .22 rifle ka bener aru aser sür alisang

tsübodaksütsü mechi injang asem khaloktsüba mapang injang ka agi tasümgang teko nung akha aser pa iba zübu ajanga asü. Tasümgang anasa nok ka liasü, ta sangdong ajanga ashi.

Ozüng agi melaba maparen ajak inyakba sülen tasümgang aser iba nisung tepset ta temolung meleme alisang Moasangba Jamir (61 Yrs) S/O- Lt. Among Jamir V/O- Chuchuyimpang ya apu aser pa ket nungi .22 rifle ka den injang pezü apu aser iba tesem nung .22 injang tazümgang asem ngutet.

Iba lendong nung asümgang ya arishi küm 54 tain Longshang S/O- Lt. Longching V/O- Angchangyang, Dist- Mon ta jangjatetoggo shiba tai tonglokja alisanger farm nung mapa inyaker ka liasü.

Iba sülen October 18, 2023 nü IMDH Mokokchung nung Post Mortem examination agiba sülen tasümgang ya kinunger nem agütsü. Iba tatalokba dak sendakba nung Suo Motto FIR ka aser ano 'regular case' ka

Mokokchung PS-I nung benoka bushisüngdangba mapang lir, ta sangdong ajanga ashi.

Iba tatalokba dak sendakba nung nisung telok kati October 18, 2023 nikongdang mozüki (IMDH) raksatsüba atema khukhua aitsür, ta Dr. Imkongliba Memorial District Hospital, Mokokchung aser Chest Diseases & TB Hospital, Mokokchung nung ketdangsür temi sangdong ka ajanga ashi.

Iba ama tim masüba mapa inyakba ya ajanga shrianger aser staff tem lendongi yokba kisüng masü saka nungdakba mapang nüburttem tenzükba tongtipang mozüki indang ki o jen nung teti asoshi tarak kettsür, ta ashi.

Mozüki tem ya taneptsü angudak temeshi tesem lir, kong rongrongshirong aser teraksa melen temeim aser anepalu alitsüla. Nisung telok-telok iba ama yimya amshiba yagi healthcare system nung timtem agütsür. Anungji iba ama inyakyim ya kija aser lokti tentet ajungai

aitsütsüla aser pei jurula indang ama anepalua tarutsü nung iba ama tia nungi jenbua alitsü imlar ta sangdong ajangasa ashi.

Mokokchung Town Lanur Telongiem (MTLT) ajanga sangdong ka nung October 17, 2023 nü Longshang Konyak khasetba asoshi temolung khurema jashiba lemsateper ta ashi.

Mangyimer kibong den MTLT-i asükhü lemsateper aser Mokokchung Police-i kanga kera mera agiba asoshi tenümgang agütsür, ta ashi.

Iba ken o kanga junga bushisüngdang tekeratiba nung aibelener nem tapet temerenshi agütsütsü akhanger ta MTLT sangdong ajanga ashi.

Kasa mapang tazüokba maliba nisung telok kati October 18 nikongdang IMDH nung teka sangshia raksatsüba khuhua aitsür, ta ashi.

Nüburttem taneptsü anguba tesem yamai raksatsüba ya khenyongi tim masü aser kecha

tensa nunga magizükteter. Iba ama yimya yagu mozüki nung inyaker molungjang nung tetsübo aita daksür aser mozüki nung munga aliba shirangertem daka kongshitsü akok, ta MTLT sangdong ajanga ashi.

Anungji shidak angatetba nüburt mesüra telok kechiaia nüburttem amshiba tesemtem, talisa mozüki amala nung teka mesangshitsüla. Anogo ishika tsüngta tensa mejungi akumba atema sasa bilemer aser ozüng amshir temi ochi obendang agütsüba ata alidang tangatetba tajung alitsü imlar, ta sangdong ajangasa ashi.

Osang kar ajanga ashiba agi, asür Longching tasümgang ya Post mortem agütsü atema Bodhbarnü 12:00 ako meta IMDH-i bener ao saka nikongdang 6:00 ako tashinunga kinunger aser yimsür-yimer nem tasümgang magütsüba mechi mozüki nung long agi ona oset kar raksatsü. Ajisüaka police tem arua tensa aziüoka liasü.

National Integration Tour team-i Rashtrapati Bhavan semdang



Minister for Women and Child Development and Minority Affairs Smriti Irani, den ajurute pba mapang tangokba noksa nung angur

Dimapur, Mongputeni/October 19 (TYO): Inspector General of Assam Rifles, North (IGAR-N) tawabangba kübok Phek district nungi Mothers & Widows Association kübok tetsürtem atema National Integration Tour ka 38th Assam Rifles, Phek Battalion ayongzüka agidar.

Iba sentong ya October 15 nü Phek jila nung Commandant Col. Prashant Singh Chunduwat-i tenzüka liasü. Iba sentong ya October 23 nü tembangsü.

Assam Rifles sangdong ka

ajanga ashiba agi, Phek District kübok Mothers & Widows Association nungi tetsür 16 Delhi October 17 nü atong aser October 18 nü Rashtrapati Bhavan semdanga liasü. Iba mapang parnoki Shastri Bhavan semdanga Minister for Women and Child Development and Minority Affairs Smriti Irani den sensak asem aser iba ajanga parnok tebilemba aser tajangshibatem lemsateptsü asoshi maongka agütsüogo.

Tetsürtem yagisa India Gate aser National War Memorial

semdang kong parnoki linük asoshi taküm bendanga agütsürtem nem tetushi agüja liasü. Osang ajangasa parnoki maneni tesem aika semdangtsü aser mall tem nung shishitsü ta metetdaksü.

Phek district kübok Mothers Association & Widow Association nung tetsürtem nem North East tesem ajanga oa tangar libaliro asadangtsü aser linük nung tongtibang tesemtem semdangtsü asoshi maongka agütsütsü nükjidong nung iba tour ayongzüka agir.

Alternatives for SUPs dak sendakba nung stakeholder tem senden amen

Dimapur, Mongputeni/October 19 (TYO): Alternatives for Single Use Plastics (SUPs) dak sendakba nung stakeholder tem senden ka September 25 nü Urban Development Directorate, Kohima Conference Hall nung menogo. Iba senden ya IAS Commissioner aser Secretary to the Chief Minister of Nagaland Kesonyu Yhome lenisüba nung mena liasü.

Senden tetenzüki mendenbubai state nung SUP melena tanga osettem amshitsü atema maparen benoka inyaksangshitsü asoshi aser tejakdangi aotsü atema lenmang bushitsü nükjidong nung iba senden ayongzüka amener, ta ashi.

Paisa, sensaksem mapang khen dak amshiba plastic osettem dak sendakba nung tang tashi kechi angateta ali iba indang sensak masemtsü, saka tanga state aser yimitem nung SUP ken o bentettsü atema takok ngua benoka inyakba inyakyimtem angazüka state den apet inyakyim meleshia benoktsü asoshi lenmang bushitsü atema sensaksemtsüla ta ashi.

Sentong nung entrepreneurs temi biodegradable properties keta aliba tanga osettem koba ajanga khen dang amshiba plastic osettem melentettsü, iba indang benoka liasü. Ajisiüka

parnoki ashiba agi, tanga osettem ya khen dang amshiba plastic osettem dang nungi jenjang tasakba asütsü ta shisem.

Auso, spoon, jana bendendak, yangku aser luli densema SUP melena amshitsü asoshi shishilembadak tanga osettem lir. Healthcare aser hospitality services temi khen dang amshiba osettem timba amshir. SUP melena amshiba tanga osettem supplier temi shishilembadak item osettem lemshitsü atema sorkar teyari meshia liasü.

Kasa mapang nung Nagaland Pollution Control Board (NPCB)-i, khen dang amshiba plastic osettem yangluba company tem Central Pollution Control Board (CPCB) standards aser certification sülen tashi anga anidaksütsü atema entrepreneurs tem khuret lir ta jangjashitsü.

Trade licenses dak sendakba nung Urban Local Body (ULB) administrator temi, stockist aser supplier temi state nung yimti aser jila nung parnok sasa supply mesüra main stockist, supplier, aser retailer tem license tenügdakba balala lir, ta rasa ashi.

Stakeholder temi takokba lenlatem nung inyakyim tezübaba kümdaksütsü mulunga agizükba den

entrepreneurs tem dang SUP melena amshiba osettem jenjang tajemba kümdaksütsü atema lenmang bushitsü ajungshia liasü.

NPCB-isa, tarutsü nung production unit tem amenoktsü atema entrepreneur tem asoshi environmental clearances koda tongtibang iba indang metetdaksü. Manufacturing unit mesüra industry tasen ajak Environmental Impact Assessment agitsü nüngdaker, koba Environmental Impact Authority of the Nation-i masadang tsüngda State Expert aser Appraisal Committee-i asadangtsü.

Commissioner aser Secretary to the Chief Minister-i, shishilembadak SUP melena tanga osettem ita asem tsüngda benoktsü atema entrepreneur temi tetsükdaksü ajangshibatem bentettsütsü asoshi sorkari merangdangtsü ta tenangzüka agütsü.

State sorkarisa, administration dak sendakba nung tetsükdaksütem agintsü atema inyakyim tezübaba kümdaksütsü tenangzüka agütsüogo aser iba ajanga entrepreneur tem parnok mapa nung rangloker inyaksü asoshi lenmang lapoktsütsü. Maneni entrepreneur temia ita asem tsüngda SUP melena tanga osettem shishilembadaki yoktsü atema merangdangtsü tenangzüka agüja liasü.

NPROA inti senden Oct 25 nü agitsü

Dimapur, Mongputeni/October 19 (TYO): Nagaland Police Retired Officers Association (NPROA)-i sangdong ka ajanga züngsemtem aser Inspector nungi tema rank nung tawa mapa nungi anenba ketdangsur ajak dang October 25 nü association inti senden

ayongzüka metetdaksüogo. Bengal amala tanga state nung lila aliba züngsemtemia shilem agitsü.

Iba dak sendakba nung züngsem ajak dang senden tamakok maludaksütsü atema takok tashi arua shilem agitsü asoshi mepeshia

Iba senden nung Assam, Manipur, Meghalaya aser West

metetdaksüogo. Iba dak sendakba nung züngsem ajak dang senden tamakok maludaksütsü atema takok tashi arua shilem agitsü asoshi mepeshia metetdaksüogo.

PTM aser APAAR ID indang osang metetdaksü

Dimapur, Mongputeni/October 19 (TYO): 16-10-2023 nü APAAR nung osang agütsüba dak ajemdaker ken o dak sendaka alir ajak dang stakeholder tem ajak nem shilem agidaksütsü aser parnok shilem agitsü atema tayongba kümdaksütsü asoshi Parent-Teacher Meeting (PTM) ya October 31 nü tashi nung agitettsü, ta metetdaksüogo.

PTM session nung tsürapurtemi APAAR ID ajanga kechi tajangzüka agütsür iba indang metetdaksütsüla, koba Digilocker ecosystem amshitsü atema kikümtong ka lir.

APAAR ID ajanga kaketshirtem nem, tatidang result, holistic report card aser learning outcomes tem ama takoktem aser OLYMPIAD, saissapong, skill training aser tanga lenla nung takok angubatem indang digitally rizünga ayutsü atema maongka agütsür.

Tarutsü nung kaketshirtemi parnok indang APAAR ID credit score tem züngyonga aoba mapang mesüra mapa bushiba mapang amshitettsü Temetettsü kaji APAAR ID atema form fill up asütsü asoshi tsürapurtem mekangshitsü mesüra menongshitsüla.

Tapi bye-election atema MCMC tentetogo

Dimapur, Mongputeni/October 19 (TYO): Taruba 43 - Tapi (ST) Assembly Constituency Bye-Election atema Commission tetuyuba dak ajemdaker State Level Media Certification and Monitoring Committee (MCMC) tentetogo.

MCMC züngsemtem yamai alitsü:

1. Mendenbuba- Vyasan R, IAS Chief Electoral Officer, Nagaland.
2. Züngsem- One observer appointed by the ECI.
3. Z ü n g s e m - D z ü v i n u o T h e ü n u o , Director, Directorate of Information & Public Relations.
4. Züngsem - K. Sonikumar Singh, Assistant Director, PIB Kohima.
5. Züngsem - Member to be nominated by the Press Council of India.
6. Members Secretary- Alila

Chang, Dy.Chief Electoral Officer & Media Nodal Officer, CEO's Office.

7. Züngsem - Er. Sabou Yashu, Director, Directorate of Information Technology & Communication.

State Level Appellate MCMC yagi inyakyim ana

benoka inyaksü. Mezüngbuba nung 2004 küm April 15 nü Commission-i tetuyuba dak ajemdaker advertisement indang CEO Office nung District aser Certification Committee na nungi temepeshiba telemetba agitsü. Tanabuba nung District MCMC-i telemetba agiba anema appeal asüba dak sendakba nung Paid News indang ken o ajak asadangtsü mesüra suomotu ken o tem asadangtsü. Iba dak sendakba nung MCMC-i ken o dak sendaka aliba RO tem nem candidate tem nem osang agütsütsü asoshi tetuyuba agütsütsü.

Executive Engineer Transmission Division Mkg-i metetdaksür

Dimapur, Mongputeni/October 19 (TYO): Executive Engineer Transmission Division Mokokchung-i sangdong ka ajanga, Transmission Division Mokokchung kübok 132kV and 66kV Transmission Line atema arem merektettsü ta metetdaksüogo.

Iba dak sendakba nung mapa kecha tetsükdaksü makai inyaksü atema agüja aliba anogotem nung anogoshia anepdang 8 ako nungi 4 ako tashi power magütsütsü ta metetdaksüogo. Power supply kecha tetsükdaksü magari

agütsütsü aser nüngdaka makaba nung minprong adoktsü aliba nungi jenbotsü asoshi iba inyakyim ya benoka inyaksü nüngdaker, ta Engineer office ajangsa metetdaksü.

ECI-i November 7 nü Mon District kübok 43rd Tapi AC Bye-Election agitsü atema anogo latettsüba ajanga iba inyakyim asoshi anogo melenshitsüsa kümogo.

Maneni department-i, iba inyakyim ajanga kongshitsü aliba nüburttem ajak dang timtem arema teka amteper inyaksü mepeshia metetdaksüogo.

Sl. No	Schedule Date	Feeders	Affected area under Shut Down
1	23 rd - 28 th Oct. 2023	66kV Mokokchung-Zunheboto Transmission Line	Zunheboto District.
2	30 th Oct. - 3 rd Nov. 2023	132kV Mokokchung-Doyang Transmission Line	
3	13 th - 18 th Nov. 2023	66kV Mokokchung-Tuli 66kV Tuli-N/Mora 66kV N/Mora-Tizit 66kV Tizit-Mon Transmission Line	Changtongya Sub-Div, Tuli Sub-Div, Longleng & Mon District.
4	20 th - 25 th Nov. 2023	132kV Mokokchung-Mariani Transmission Line	



October 19, 2023 nü Bhupalpally district nung Congress lenir Rahul Gandhi aser Telangana Congress Tir, Revanth Reddy nati State Assembly election atema nüboyimba sentong ka nung shilem agidang tangokba noksa nung angur.

PM-i Maharashtra nung Rural skill dev. center 511 semzüksüogo

Mumbai, Mongputeni/ October 19 (Agencies): Brihostibarnü Ato kilonser, Narendra Modi-i video conferencing ajanga Maharashtra nung Pramod Mahajan Gramin Kaushalya Vikas Kendras 511 semzüksüogo.

Iba sentong nung jembidang Modi-i, linük aintsüsa state sorkartemi designing skill development programmes nung rangloker inyaksüla, ta ashi.

Paisa, state sorkartemi lanurtem dak rangloker skill development atema mapatong tasen aika benoka inyaksüla, kechiyong asen linüki tangar dak memetaloki aliba nung lanurtemi shilem agir, ta ashi.

Official sangdong ka ajanga ashiba agi, Gramin Kaushalya Vikas Kendras (rural skill development centers) ya Maharashtra kübok rural district 34 nung amenoker, aser itemji taoba mapang BJP lenir aser Union Minister inyaksang, asür

Pramod Mahajan nungtem nung amenoker.

"Service sector nung osettsüset tajung yanglutsü, tasa balala amshia rongsenkettzüng aintsü aser kechi osettem yangluba ajanga India-i tangar dak memetaloki alitsü; itemji metettsüla. Asenoki item ama skills nungji rangloksüla," ta Modi-i ashi.

Maharashtra nung Pramod Mahajan Grameen Kaushalya Vikas Kendras 511 amenokba ya lanur million aika skill development atema tongti mera ka agiba lir; iba anogo ya teti bilemtettsü, ta Modi-i metetdaksü.

Modi-i, "Linük 16-i mapa shia alir lanur lakh 40 nem mapa agütsütsü atema sentong yanglua lir. India-i linük atema dang masü saka alima nem mapa shia alir mongintem agütsütsü atema renemtsür," ta metetdaksü.

Maharashtra nung aliba Skill

Centers ajanga alima nung mapa balala inyaksü atema lanur jenti adokdaksütsü; item centres nung kisü-jensüba, tanü putu nung aluyimba tasa, media & entertainment aser electronics tsütsü tesayuba agütsütsü, ta paisa metetdaksü.

"Taoba mapang sorkartemi lanurtem atema skill development atema nendaka meinyak mesüra mangdang maliasü, aser ibaji ajanga industrial sector nung nübo nungdakyonga aser lanurtem dak sempet liaka lanurtem takoksa angur," ta pai ashi.

Paisa, pa mapang nung skill development ministry temeja ka tentetogo, aser ibaji ajanga lanur crore 1.30 skill development programmes ajanga tajanzük nguogo, ta ashi.

"Chichiba tajanzük angurtemji tribal lanurtem, sensaker lanurtem, Dalit aser backward class lanurtem lir," ta paisa shisem.

Tiri Raghubar Das, Odisha Angh shimogo

New Delhi, October 19 (Agencies): India Tir, Droupadi Murmu-i Odisha aser Tripura na atema Angh tasen shimogo; taoba mapang Jharkhand Chief Minister Raghubar Das Odisha Angh shim aser Indra Sena Reddy Nallu Tripura Angh shimogo.

Raghubar Das ya 2014 nungi 2019 tashi Jharkhand Chief Minister inyaka liasü.

Bihar aser Jharkhand ya state ka dang aliba mapang 1995 kum Das-i assembly election nung mezüng takok ngua liasü. Tanü tashi nung Jharkhand nung kümsük kum pongu abensa-a Chief Minister inyaksangji Das dang lir.

Das ya tang BJP National tatong Tir teinyakdak.

Ano külen, Nallu Indrasena Reddy ya Telangana nungi BJP

lenir ka lir aser pai kümsük asemben tashi MLA inyakogo. Taoba mapang pa BJP national secretary-a inyaka liasü.

Rashtrapati Bhavan-i sangdong ka ajanga, Tir Droupadi Murmu-i tena Angh shimba pelaa sangdonger aser tenati tenangzükba agiba anogo nungi Angh inyaksü, ta metetdaksü.



October 19, 2023 nü Bhopal nung Madhya Pradesh Chief Minister, Shivraj Singh Chouhan aser BJP State Tir, VD Sharma nati election atema nüboyimba mapang amshitsü atema hi-tech gari semzüksüdang tangokba noksa nung angur.

PM Modi-i Palestine Tir, Mahmoud Abbas den tejashi lemsatep

New Delhi, Mongputeni/ October 19 (Agencies): Brihostibarnü Ato kilonser, Narendra Modi-i phone ajanga Palestine Tir, Mahmoud Abbas den jembio.

Ato kilonseri Gaza nung aliba Al Ahli Hospital nung bomb lendong ajanga nisung aika asüba atema Mahmoud Abbas den mangyim jashi lemsatep aser India-i Palestine nung nem teyari balala agütsütsü, ta metetdaksü.

Tesülen Modi-i Twitter ajanga, "Palestinian Authority Tir H.E. Mahmoud Abbas den jembio. Gaza nung aliba Al Ahli Hospital nung civilian aika asüba atema mangyim jashi lemsatepogo. India-i Palestine nung dangi teyari maneni yoktsü," ta metetdaksü.

Lenir anatisa tang Middle East region nung rara adoka aliba atema jembio.

Ato kilonser Modi-i Middle East nung kiralongra, rara aser security tensa tamajungba akümba atema tebilemstsü akaba lemsatep.

Modi aser Mahmoud Abbas natisa Middle East nung aliba linük ajak nung yimjung aser security alitsüji kanga tongtibang, ta bangjema liasü.

Iba dak alia Modi-i Israel-Palestine onük nung India tangatetba kasa dang lir; Israel aser Palestine nung yimjung alitsü aser linük anaprongla nung nüburtem taginüba akhümtsübuttsü atema ken o jembia bangzüng renemtsü nungdak, ta metetdaksü.



October 19, 2023 nü Ato kilonser, Narendra Modi-i Delhi-Meerut Regional Rapid Transit System (RRTS) train semzüksütsü lia tangokba noksa nung angur. Item train ya Duha aser Sahibabad na tsüngda (kilometer 17) senzütsü.

INDIA teloktep ya state level atemabo masü: Akhilesh Yadav

Lucknow, October 19 (Agencies): Brihostibarnü Samajwadi Party (SP) Tir, Akhilesh Yadav-i, Indian National Developmental Inclusive Alliance (INDIA) opposition teloktep ya state jenjang nung masü saka linük jenjang atema dang lir, ta metetdaksü.

Anogo ishika tejaklen Akhilesh Yadav-i Congress party dang, INDIA teloktep ya state jenjang nunga asü?, ta asüngdanga liasü.

"Iba teloktep ya Delhi nung [national] jenjang nung ang lir ta onoki jangjaogo. Kecha masü, mapang tatong nung onoki Delhi atema jembitsü. Onoki ibaji agizükogo anungji iba teloktep ya state elections nungbo malitsü, anungji onoki [Madhya Pradesh] assembly election atema candidates tenung sangdongogo," ta pai metetdaksü.

Taruba ita Madhya Pradesh, Rajasthan, Telangana, Chhattisgarh aser Mizoram state tem nung assembly election agitsü. 2024 kum tetenzüklen Lok Sabha election agitsü lia state pongu nung assembly election ya kanga tongtibang asütsü.

Mongolbarnü Akhilesh Yadav, Sitapur-i oa Lok Sabha election dak sendakba nung

ayongzükba SP sentong ka nung densema liasü.

Taoba mapang Uttar Pradesh Chief Minister, Yadav-isa, 2024 kum Lok Saha election nung par party-i state nung Lok Sabha menden 80 prongla nung tokteptsü, ta metetdaksü.

Madhya Pradesh assembly election atema SP-i candidate 31 tenung sangdongogo. Madhya Pradesh election atema SP incharge, Vyasji Gond-i, parnoki assembly menden 230 prongla nung tokteptsü, ta metetdaksü.

SP-i Uttar Pradesh nung dang toktepa aruogo, ajisiüka national party akümtsü nükjidong nung parnoki tanga state election aika nunga tokteptsü nükjidong lir.

1992 kum SP ya regional party ka ama tenteta liasü aser 2003 kum nungbo parnoki Madhya Pradesh assembly election nunga menden tenet nung takok ngua liasü.

2018 kum MP assembly elections nung parnoki menden 52 nung toktep saka menden ka nung dang takok ngua liasü, ajisiüka SP MLA jagi party toktsür BJP nung aden.

Mongolbarnü Uttar Pradesh Congress Tir, Ajay Rai-i SP dang Madhya Pradesh nung Congress pusemdaktsüner, ta mepishiogo.



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI (OCTOBER) 20, 2023

Arungma, mapa inyakdi

Asenok ajaki zülutsü, azüngtsü aser jembitsü dang masü saka kechisarina yanglutsü, tsünütsü aser inyaksü meteta lir, anungji asenoki metetbaji mapa kümer inyaksü dang anunga lir. Tsüngremibo asenok nem asen nungdak ajak agüja lir, ajisüaka itemji kar metsüjang, anungji alu yimpet ayim nung dang asen dang masü tangartema dena peritsüsa asenoki züsentettsü, ano karbo tazü dang, anungji itemji bushia bener arua awazüa achi nung dang tebok asüngtsü. Item ajakji asenoki asen temang anema alitsü asoshi anogo shia 'physical exercise' agiba amai bilema mulungsua aser pelashishia inyaksüla. Atangji, alima nung asenoksa tia takaba, kechiyong asenok makatsü maka saka asenok akabatemji kar tamshi mashi aser kar tamshibo shir ser nung azümasenba agi mamshir, ibayongji asenok ya makaba agi masü saka meinyakba agi sensaker aser timatemer. Aji oda, tang asenok jakla ya bilemdangra, asenok nembo sen menungba machine angati bener arua ajungdaka yutsüyonga asenok azümasenba agi, asenokibo memenungtsü mesüra tsümar chanuang kar bushia bener arua menungdaksütsü merangtsü südi ta bilemer. Asenok dak aketba iba tashimaitji dang masü saka ano asenok dak mangatet ka alibaji asenok class ter danga ajangtetra, joko teka mapa kecha meinyaksüla, khu bener mejajatsüla, alui maotsüla, ali mapa meinyaksüla, soruchioka masütsüla, kia maoktsüla kechiyong itemji nümadangtsü mapatem masü saka mejangbo mejangshia mejangtsüla, mobile set-bo sen tasakba jenjang ka amtsüla aser süoshia tajung agitsüla aser teka nung teti sen alitsüla ta bilemer, kechiyong class ter ajangteteter dang asen lima nung "Educated" ta ajar aser asenok asoshi 'Educated' ta asüba ya ita petinu atongba amai lir. Ajisüaka, ita petinu atongertema tebelemba belema inyaker aser pei taküm samaa matidaki lendong ajak tizükteta inyaker ta asenoki metettsüla. Ashiko, 'Educated' ta asüba ya tangar oshi asüba agi asenoki junga mangatet asütsüa akok, ajisüaka kodang asenoki English ocep nung reprangdangdir, Educated ya Latin oshi 'exducere' tetezü asenok kecha memetet aser inyak mashi asüba taküm jenjang nungi inyak shia taküm tasen kümdaktsü mapaji 'education' lir, anungji education ajangteteter dang 'educated' ta ajar, tetezü mapa inyak ashirtem. Ibayongji 'educated' purtem alidaksa kiojena tajungba yanglutetter, kima yimdonga temerükba aser topur tajungba asür, chiyongtsüa tajungba awazüa chitetter aser alua tajungba yimtetter. Ajisüaka, class ter ajanger asentzü sena mapa inyaksü aaker, class 14 ajangra ajibo temeyonga meküraktsü aser 16 ajangtetra, ajibo yipten nungi malutsü, tetsüng agi mera kata maotsü, nok, mertsüng aser alulem nung sodaktsübajibo tashipangtsü mapatem ama asütsü ta bilema tain kümdaktsüra aser tain agi tantsür tambur kümadokra, 'educated' tetezü kechi asütsü? Educated süra arungma, teka mapa tajungba inyakdi, alu tajungba yimdi, ali agi, long agi aser süngolemba tapu ajak agi tagitsü kümdaktsüdi. Tangarbo educated kümer külenang mapaa temerangba inyaker, tesaka yaktaba saaker, kaketa educated kümer tazungba azünger, educated purtemi ayimba lusa tajungba asür aser educated purtemi aniba nung lokti azükarudaktsür. Alima nung alir ajak peritsüsa chiyongtsü züsentetba ya educated purtemi ayimba agi lir, kasaji chiyongtsü tajungba awazüa chitetba ya educated purtemi awazüba agi lir, educated purtemi inyakba agi lenmanga tajungba akümer, light-a tajungba arur, alima tesüngjamba akümer aser nisungtem sorubangrua tajungba küma aiener. Atangji, nisungbo educated saka alimabo educated lima memesük ta alitsüa akok, aji educated purtem azümasen aser ochimashiba ajanga dang asütsü. Iba ama limaji asen lima masütsüsa arungma, asenokbo mapa inyakyim indang dang o o agi jembia mekazüi, tetsüng agia odi aser teka agia inyakdi, machine-a amshidi aser asen lima yimji-yimjung lima ka kümdaktsütsüsa asentzü alua inyakdi.

OLEMSABANG

KOMA ANGATETER

~ T. Lima Tzüwar,
Ungma Aonglenden, Artang Ward

September 18 anepdang ni tenla kidang sarasadema alidang ola kati yamai ashi, japang mayim agi sünga aliba ABAM nung tenzüker aser Molungkimong aser Molungyimsen nung aliba tenzükertem, nenok akidang otsüla oboula nunger lia aruba kangabo tejembi, kechi ogo aji tanaben meyipa marutsü aser nenokji tanaben tasemben semchirtem tang lir, saka ochia amangang, aji mesüra lendong lir ta ashi. Ano September 27 anepdang ni sarasadem tatemi ola kati yamai ashi, alima nung nütsüng nübur ajak ya ken mechiyong marem asateper aser aser tzü ken majem maremer, saka mi kangla nung 70x7 mi nung arutsüba nütsüng nüburtem koda temeimtsü, nenok khristantema Yona ama tashi mangaba nübur ola tia taküm ama asüküm tenük meremtep agi sünger anogoshia rongsen tang benbua alitsüba nüburtem mi nung 70/7 tatsük nung kümsa küm rongga melinera ochi shia amangang. Nenok kodang südir süaka tasünüa pei-i inyakba yari obendang agütsütsü, idangji tepu shitepa ajebtsü ta ashi. Khrista nung temeim nütsüng nübur aser amangbapur tajungtem asenoka Yona taküm ama malitsü merangdi arungma. Au asenok ajak akümlir lima nung alir asünung asen chirmnur aser asen tepok chiyongtsü asoshi rongsenji kanga tang nungdak asen tepok chiyongtsü den aben suoshi aser asen chirnur mesütsü rongsen makai taküm melitettsü. Saka tamanger-a masü limapur-a masü, Hindu nungera, Muslim-a masü telempet alitsübo kanga tasak. Tang amaisa liyonga aonungbo aser amangtet nungbo asen kodang ba akümlir lima toktsür odir 70x7 ben mi nung machi majem mechiyong alitsüji kanga tsübuseta bilemer. Au iba tebenja aser temenen lima nung alir asünung tajunger tamajunger ajak timtem tuoshi alitsü, saka Tsüngrem akümtsüba Tsüngremi mulungba ama asen takümji alitsü merangtsüla. Akidang otsüla oboula nunger mapanga tamang yimsü meliaka kotak aser mulumiji jembiasa aru, anungji ochishia Meyutsüngba akümtsüba litepa otsütsü angazüka aru.

KIBUBA YIMLIBILEM

"Kechiyong pai jashidakjaka, aji saka pa aria bilemba jenti, Pa temeim yimlibilem yari alitsü" Aiatai 3: 32

Yusalem mi agi rongtok, iba asoshi Yiremia ainkar temulung raksa-a ajep. Teraksa arutsü indang pai shinba nüburtemi mangashi ama yutsü. Ayatai kakat ya pai shinba atalokbatem aser teraksa asoshi mang ayimba züluba kakat ka lir.

Kodang pa temulung ajak raksa-a Yusalem temenen asoshi ajep, idangji Tsüngremer temeim aser anisüngzük tulu pa dangi jungkai adoka, iba jagi pa temulung anisüngzükba asenoki angur. Tsüngremer tashi, taochi aser mulung süngzük ajanga Pa nem teimla tasen ka agütsüba, aser tarutsü asoshi tasü tait shisatsü agütsüba angur, anungji pai ashi 'Kechiyong Kibubai tetibo mejentoktsü" (Aiatai 3: 31). Asen Tsüngremji tatasaba Tsüngrem, Pai merenshir, Pai artsür aji saka Pai aochir. Kechisarena nung tejashi ama dang süaka, itemji tatembang masü, Paibo meimer aser aremzüker.

Asen taküm nung tejashi, mulung raksaba tia ajuruaka pai tepela aser temoatsü agi melentsütsü. Aser idangji asenoki Pa temeim, taochi aser aria bilembatem metetsü. Asen nem teimla tasen ka agüja lir, Tsüngrem tenüng sangang!

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tripura nung court-i Khristan kibong ana pusema obendang agütsü



Tripura nung tribal Khristan kibong ana noksa nung angur.

October 19, 2023: Northeast India nung aliba state Tripura nung court kati Khristan yimsü agizüker tribal kibong ana reshikangshi masütsü tetuyuba agütsüogo.

October 17, 2023 nü Tripura nung High Court-i sorkar ketdangsertem dang, Khristan kibong ana- Purnomoy Chakma aser Tarun Chakma'er kibongtem kümzüksü atema inyang, aser parnok anema inyaktertem aputsüla, ta tetuyuba agütsüogo.

Yaküm November ita nung Chakma kin nungi kibong ana jagi Buddhist yimsü toktsür Khristan yimsü agizükba sülen yimdaklirtemi Khristan kibong anaji jendoka liasü.

Unakoti district kübok Pashchim Andarcherra yimdak nuungi Khristan kibong ana jagi High Court dang, Chakma Social Arbitration Committee aser Adam Panchayat nati parnok loktiliba nungi jendokba ajanga parnok kanga timtemer, ta metetdakja liasü.

Ken o angadanga aruba sülen Justice Arindam Lodh-i Chakma customary rejutem dang, linük temzüng alema tetuyuba agütsüba anenang, ta metetdaksü.

Justice Lodh-isa, "Linük temzüng ajanga senso ajak nem tamangba yimsü temeden agütsür. Chakma lokti tentetemi yimsü nung ajemdaker inyakba mapatemji linük temzüng alema lir," ta metetdaksü.

Agartala nung aliba Arogo nung social communications secretary, Ivan D'Silva-i High court-i linük temzüng kübok Khristantem pusema obendang agütsüba atema pelaba lemsatap.

October 19 nü osangbener den jembidang Putir Ivan-i, "Tripura nung high court obendangji tenüngsang agütsütsü tetemsü, kechiyong ibaji ajanga asen state dang masü saka northeast India nem tongtibang osang ka sangoktsür," ta metetdaksü.

Society of the Divine Word nungi putirisa, linük temzüng kübok sayutsüngitsü aser peii melungba yimsü amanga benshitsü atema senso ajak nem

temeden agüja lir, ta ashi.

"Sensotem temeden anema shingai inyaktsü makok," ta paisa shisem.

Arogoi tangartem yimsü meyipdaksüba nung shilem magir, ta pai ashi.

"Court obendang ajanga Khristan yimsü agizükertem mezüngmeshiba tribal teloktem nem osang tejangja ka sangoktsür," ta pai ashi.

Osang angazükba agi, Chakma Social Arbitration Committee aser Adam Panchayat nati, Khristan yimsü agizüker tribal kibong anaji Khristan missionary tem sang nung shiogo; Khristan yimsü agizükdaksütsü atema parnok mesüzika liasü, anungji Khristan kibong anaji loktiliba nungi sendoktsüla, ta tuyua liasü.

Iba sülen Khristan kibong anaji kanga timtema arur tesüsa taküm June 26 nung kibong ana jagi high court nem temepishiba ken o agüja liasü.

Aayanger, Purnomoy Chakma-i court dang, Mahatma

Gandhi National Rural Employment Guarantee Scheme kübok mapa inyaktsü atema pa nem temelaba magütsür, ta metetdakja liasü aser auto-rickshaw driver, Tarun Chakma-ia court dang, joko nisungtemi pa indang auto hire masür, kechiyong pa indang auto nung amenertem dang senchi tulu achitsü tetuyuba agüja lir, ta metetdakja liasü.

High court nung ken o angadanga mapang nung Chakma Social Arbitration Committee aser Adam Panchayat nati court dang, onok meyong customary ozüngtem lir, anungji parnok tanaben Buddhist yimsü dangi meyip nung ang parnok loktiliba nung tanaben agizüktsü, ta metetdakja liasü.

Nütsüng lakh 37 aliba Tripura state nung tang Khristan nütsüng 159,882 lir aser ibaji state nütsüng shilem 4.35 dang lir. Khristantemji teimbaka Tripuri, Lushai, Kuki, Darlong aser Halam lisopurtem lir.

ANOGO ABEN TSÜNGREM DEN

Takük O

Aser parnok o parnok na jembitepa ashi, lenmang nung pai asenok den jembia Laishiba ratetta sayudang, asenok temulungjang marong ama ? Luke 24:32

Yisui Pa nendaka bushir den aden. Nisung ana Emmaus lenmang nung Yirusalem nung atalokba süngmanga jembitepa jaja. Parnok anogo nung atalokba parnoki angatetogo ta bilem saka Yisu asüba ajanga Tsüngremi parnok lima nung inyakba mapa parnoki mangatetti aküm. Yisui Messia ta parnoki imla saka Pa asüba ajanga parnok süngmang aser tasü meiti aküm. Parnoki telangzüba nungdak.

Tsüngremi temulungjang repranger aser Pai mulungba ochi shia bushir Pa chirtem Pai metetter. Yisui item nisung anasa ao , parnok den jaja aser Laishiba kechi ashir aser kechi atalok aji angatettsü parnok temulungjang lapoktsü. Yisui jembidang parnok temulungjang nung arong. Yisui Lai nungi jembidang parnoki kechi ajangshi iba den medemdangdang, parnoki Tsüngrem O angar ta parnok mulung nung metetta aru. Parnok terata sama, tepela agi asüng aser parnok tembartem den ochibaji lemsateptsü meyipa aru.

Na tensa tia agi ratadakja lira, Yisui item nisung ama dang inyakba ama Pai Laishiba ajanga ne terata ajak angatetdaksütsü. Nisung tsütsü nungi tiaji tebangkatsü asütsü aser tasü maitsü asütsü aser tasü maitsü asütsü akok. Laishiba ochibaji angatettsü asoshi Yisu atenba nungdaker. Ne tensa mapang agi na ratadakja lir asü? Yisui anguba ama angutsü asoshi na Yisu nungdaker. Nai ken Yisu nungi angashira na item nisung ana ama ya akümtsü, Tsüngremi kechi inyaker iba nung adentsü aser tepela agi nai ajuruba Tangartem den lemsateptsü.

T. Ken 83 nung Israel-Gaza rara indang shia lir: Joel Rosenberg

October 19, 2023: Tang Israel aser Gaza na tsüngda raraba ya Laishiba nung Tenüngsang Ken Tapu 83 nung shia lir; iba Lai ya küm meyrjang aika tejaklen züluba lir, ta kaketzülor aser Middle East nung mongin, Joel Rosenberg-i metetdaksü.

AllIsrael.com nung yimobilem zülur, Rosenberg-isa, "Laishiba ya auyi ponga aliba kaket tejen ka dang, ta kü dang teshi," ta metetdaksü.

"Tenüngsang Ken 83 nung Tsüngrem indang shia lir aser tsükchirtemi Tsüngrem nüburttem anema tasa tamajung yangluba indang shia lir. Tekong 4 nung tsükchirtemi, 'Arung, asenoki parnok linük ka ama samadaksüdi aser Israel nungja ya joko mebilemtetdaksüdi,' ta shia lir," ta Rosenberg-isa metetdaksü.

"Tanü osangkakettem nung aliba 'headlines' ji Tenüngsang Ken 83 nung shia alibatem lir," ta Rosenberg-i metetdaksü.

"T Ken 83 nung tekong 6 nungi 8 tashi nung Israel atema tsükchir balalai Israel aser Yihuda nung anemba indang shia lir. Item Lai tekong nung Edom, Ishmaelites, Moab, Hagrites, Gebal, Ammon, Amalek, Philistia, Tyre aser Assyria indang shia lir. Edom aser Ishmaelites indang sükitem tetezü southern Jordan aser Arabia lir. 'Moab aser Hagrites' ji central aser north Jordan lir. 'Gebal aser Ammon aser Amalek' ji Lebanon, Syria aser Sinai peninsula lir. 'Philistia' tetezü Gaza Strip lir. 'Tyre' nung alirtem tetezü Lebanon lir. 'Assyria-ia parnok den longjemer' - ibaji Syria, Lebanon, aser Iraq lir," ta Rosenberg-i yimobilem nungji zülua lir.

Tenüngsang Ken Tapu 83 ya tanü putu nung tapet aser tang tatalokbatem indang asadangtetba lir, ta pai ashi.

"Yangi T Ken 83 nung

tongmelang agi shin otemji English nung tekong 18 dang lir - Item linüktem nung alirtemi Israel aser Yihuda nungertem sempatsü, ta Tsüngremi asenok nem jelia metetdaksü. Kechiba? Kechiyong parnoki Israel Tsüngrem sempar. Laishiba nung aliba Tsüngrem sempar," ta Rosenberg-i metetdaksü.

Iba Lai nung Israel tsükchirtemi Israel ya linük ka ama samatsünüba indang shia lir, ta pai ashi.

"Atangji Hamas-i iba nükjidong yur inyaker. Gaza nung aliba Palestine nung ajaki Hamas telok den ai-aura akar aser Israel nung jenti tepsetner, ta ni mamanger. Ajisüaka karibo yamaji atalokdaksüner. Saka parnoki tamakok angutsü, kechiyong parnoki Tsüngrem nüburttem (Israel nung) amaker," ta pai ashi.

"T ken 83 züluri Tsüngrem dang Israel nung

tsükchirtemji mopung matsüngdang auyi aser tsük-sü ama samadaksüner. Iba Lai zülurisa Tsüngremi tsükchirtem temelung meyipdaksüner aser Pa dangi meyipdaksüner," ta Rosenberg-i ashi.

"Lai tekong 16 nung yamai shia lir, 'Oh Kibuba, parnoki Na bushitsüsa parnok maaksüdakjang,'" ta paisa metetdaksü.

T Ken 83 ajanga tanü Israel atema Khristantem koma sarasademsüar shia lir aser ibaji tanelai anidaksüba sarasadem, ta pai ashi.

"Ibaji atangji ataloktsü. Anungji Israel atema kü den külemi sarasademang. Iba dak alia Gaza nung Palestine nungertem tesempa yutsür Chubatem madak Chuba aser Kiburtem madak Kibur Yisu Khrista nem parnok taküm bendanga agütsütsü atema sarasademjang," ta pai mepishia metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sara

(v) tashikang salaba (spread out)
* An tepongi pa tezüing sarar akonger.

Sarasadem

(v) Tsüingrem den jembiba (prayer)
* Asenok sentong ajak sarasadem tenzüker.

OLONG PAITEP # 6671

	1				2	3			
4			5						6
						7			
	8								
	9		10				11		
						12			13
14									
						15			

TIPLIN

- 2. Süjeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapang süiadok - (4)
- 9. Tsüingrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüingda jatepba - (4)

OLONG PAITEP # 6670 TELANGZÜBA

TIPLIN :


- 1. Semtu, 3. Lepko, 5. Bilem,
- 8. Ulu, 10. Tsüingpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER MA

Tang tashi Indian President menden nung anaben atonga amenbaji Dr Rajendra Prasad dang lir. Pai 1952 nungi 1962 tashi Indian President inyak. Pa 1952 küm nung khen aser 1957 nung khen ta anaben tashi atonga President inyaksü shima liasü.



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Manipur Angh-i temzüing ozüing alema inyaksangshi masütsü ashi



Anusuiya Uikey

Imphal, Mongpuiteni/ October 19 (Agencies): Manipur Angh Anusuiya Uikey-i, temzüing ozüing raksartem aser mepetmesü a d o k d a k t s ü t s ü s a inyaksangshirtem nem linük temzüing ozüing dak ajemdaker tapet temerenshi agütsütsü ta shiogo.

Raj Bhavan sangdong ka ajanga Angh-i, state nung yimjung asoshi inyaksangshiba mapang nüburtemi teka amteper inyaksü aser yimjung asoshi inyakyim raksatsütsüsa

jenjang kecha magütsü atema mepeshia metetdaksüogo.

Lai, Manipur nung aliba nüburtemi teka amteper inyakba aser teyari agütsüba ajanga state nung tanem tanemi tensa tajungba küma odar, ta ashi. Manipur nung Meitei aser Kuki nunger mangatetep adokba sülen tang tashi nung nisung 175 taküm samaogo.

Anghisa, nisung taküm samba aser kiojen raksaba dak sendakba nung, Manipur nung kin ana tsüingda mangatetep

adokba mapang shirnoksa pei talidak ki, osettsüet amala samaogo parnok nem sorkari temenok agütsütsü, ta ashi.

Manipur nung akhi ama yimjung benoktsü atema security personnel aika yokogo aser nüburtem tekümzüka kübok toktsütsü atema security kanga junga anepalutsür lir, ta laisa shisem.

State sorkari ken o dak sendakba aliba department tem ajanga, kuli kaket aser bank passbooks, CMHT cards, Ayushman Bharat cards, ration cards, old-age pension cards, Aadhaar cards amala card tem samaba meüsra raksatok tanaben agütsütsü asoshi inyakdar aser iba den nüburtem shirnok pei talidak yimtsüing toktsür relief camp tem nung jenoka lir, parnok asoshi jenjang tapet agidar, ta lai ashi.

Iba atema lai DC dang mobile center tem lapoktsütsü asoshi tetuyuba agütsüogo.

Meghalaya: Cabinet-i NTPC sentsüh aotsü temelaba agütsü

Guwahati, Mongputeni/ October 19 (Agencies): State cabinet-i, National Thermal Power Corporation (NTPC) nem sen crore 565 sentsüh agütsütsü aliba aotsü atema temelaba agütsüogo.

State indang power minister A.T. Mondal-i ashiba agi, sentsüh ya installment 20 nung aodoktsütsü.

Meghalaya Power Department-i sentsüh aotsü atema benokba state cabinet-i agizük, koba Chief Minister Conrad K Sangma lenisüba nung mena liasü.

Osangbenertem den sensaksemba mapang Mondal-i ashiba agi, sentsüh crore 665

ajungba sülen department-i sensaksemtsü atema NTPC ayongzüka liasü.

Sentsüh ya tali kümdaktsüra yakta crore 1000 ajungtsü aser Meghalaya Power Distribution Corporation Limited (MePDCL), Meghalaya Energy Corporation Limited (MeECL) aser state sorkar atema tebilemstü tulu akümtsü.

"Senden balala mena sensaksemba sülen NTPC-i, sen crore 664 mesüra 665 agütsütsü aliba nungi sen crore 565 dang agütsütsü asoshi mulunga agizüka liasü. Anungji iba dak sendakba nungbo anisüingzük nguogo saka sentsüh ya installment 20 shi

nung aotoktsüla," ta pai ashiba den NTPC-i sen crore 100 tai atoktsü mulunga agizükogo aser interst rate-a tajemba kümdaktsütsü imlar.

Power minister-isa, MeECL rongsenketzüing nung jenjang mejungi lir, ta ashi.

"Iba yongji state sorkari sen crore 565 ya NTPC nem agütsütsü atema telemtetba agiogo. Onoki maneni sentsüh ya installment 20 nung agütsütsü mesüra installment dak sendakba nung anisüingzük teraba agütsütsü iba atema NTPC den sensaksemdar, ajita asünungdang installment khuret tajemba akümtsü," ta pai shisem.

Mizoram assembly elections: AAP-i candidate tem sangdonggo

Aizawl, Mongputeni/ October 19 (Agencies): Aam Aadmi Party (AAP)-i, Mizoram assembly elections 2023 atema mezüingbuba candidate tem list sangdonggogo.

AAP-i Brehotibarnü (October 19) taruba Mizoram election atema candidate pezü

tenüing sangdonga liasü.

Mizoram AAP tir Andrew Lalremkima, Aizawl North III constituency nungi tokteptsü atema shimogo aser kasa mapang nung Vanlalmawia V a n c h h a w n g , Biakthianghlima aser Lalngaihawma Pachau nunger

Aizawl West I, Aizawl West III aser Aizawl South I nungi tokteptsü atema shimogo.

Mizoram legislative assembly nung menden 40 atema election ya November 7 nü agütsü lateta lir.

Election agiba sülen vote December 3 nü azüingtsü.



Imphal, October 19: Manipur nung mepetmesü adoker aliba teyalong nung security forces armoury balala nungi auyar aoba hadir 5669 nungi tang tashi nung Security forces aser police-i 1350 nguteta lir.

GOVERNMENT OF NAGALAND
DIRECTORATE OF ART AND CULTURE

NAGALAND :: KOHIMA

ADVERTISEMENT

Dated Kohima, the 19th Oct. 2023.

NO. AC/ESTT/Advt-NGO/2019-20: In pursuance to the approval of the Government of Nagaland conveyed vide letter No.AC/ESTT-5/2022/103 dated 17th August 2023, applications are hereby invited from indigenous inhabitant of Nagaland for filling up the post of Driver (Group-C), Directorate under the Department of Art and Culture.

Sl. No.	Name of the post	Pay Matrix level	Number of vacancy	Reservation for Backward tribe
1.	Driver (Dte)	Level-3 of Rs.18000-56900	2	1 (one) post reserved for Konyak tribe

TERMS AND CONDITIONS

- Educational Qualification :** Minimum educational qualification will be Class-VIII passed.
- Age as on 01.01.2023 :** Minimum - 21 Maximum - 30
Relaxation of upper age limit for ST/SC Candidates and Government Employees shall be as per Government Office Memorandum
- Documents Required:**
 - Educational Qualification.
 - Birth Certificate.
 - Indigenous Inhabitant/Scheduled Tribe/ Backward Tribe Certificates.
 - NOC from HOD for Government Employees (in original)
 - Driving License (mandatory) & certificate from a recognized Driving Institute, if any.
 - 2 Nos. of recent Passport size photos.
- Application submitted prior to this advertisement should be re-submitted afresh.
- Applications received after the last date and incomplete documents shall be rejected and no representation against such shall be entertained.
- Eligible candidates shall be shortlisted and displayed on the Notice Board of the Directorate of Art and Culture/ Department website www.artandculture.nagaland.gov.in on **10th November, 2023**.
- The Department will notify the date of Driving Test and Interview in due course of time.
- Application alongwith required documents should be submitted at the office of the Directorate of Art and Culture, Bayavu Hill, Kohima, Nagaland during office hour.
- Last date of submission of Application is **4th November, 2023**.

Sd/- ADELA MOA
Director,
Art and Culture,
Nagaland, Kohima.

SANGDONGER

Chuchuyimpang Mongoya Prayer Garden nung 27th to 29th October, 2023, anogo asem Healing Crusade sentong agitsü renema lir. Anungji nübür shirnok shi aser Tanela nung taneptsü aginüa ali, temulunger ajak arua Tsüngremer temoatsü agitsü pelashishia jaoker.

Tongtepratepdak - 9856486841 / 8258802047

Mapang - Aonung : 5:00PM
Anepdang : 9:00 AM
Anüngdang : 12:00 Noon
Sunday Devotional : 10:00 AM

Lavrov-i North Korea semdanga tesendaktep akangshir

Seoul, Mongputeni/Oct. 19 (Agencies): Moscow-i North Korea lenir Kim Jong Un yaritsü temolungtetba lir, ta Russian Foreign Minister Sergei Lavrov-i ashi.

Lavrov ya tang North Korea nung arua lir aser par linüki Ukraine nung raraba mapang yariba asoshia pelaba lemsatepa liasü.

Pai tang iba linük semdanga ya ajanga Tir Vladimir Putin-i semdangtsü asoshi sapang yanglutsütsü südi.

Ukraine nung amshitsü asoshi North Korea-i Russia dangi nok-nü bener yok tanzükogo, ta US-i taoba hopta shia liasü.

September ita Kim-i Russia semdanga sülen tang Lavrov ya North Korea nung anogo ana asoshi arua lir. Taoba ita Russia semdanga ya pandemic sülen Kim-i linük alema aoba mezüngbuba alitsü aser iba mapang pai Putin ajurua mitkar tsütsü amalitep akatsü jembia liasü.

July ita Russia indang defence minister-i North Korea semdang aser pa dang Hwasong intercontinental ballistic missile densema North Korea indang nok-nü tasentem sayua liasü.

Bodhbarnü official reception nung Moscow-i Kim yaritsü

nangzük aser US aser par tembar linüktemi Russian federation anema rara tanzükera ta aitsü.

Taoba ita Putin aser Kim ajurutepdang renema maparen asoshi jembitsü atema arua lir, ta pai ashi saka iba dak tali rasaa mashi.

Lavrov yagi 2018 küm Pyongyang semdanga mapang ama Kim ajurutsü asü masüar mejangja.

Ajisüaka Moscow-i Ukraine anema raratsü asoshi Pyongyang dang nok-nü alir aser North Korea nungi teyari agütsüba ya United Nations pangzüng nung aibelener alitsü, ta Washington-i tekumdangtsü shia lir.

Hokulbarnü US-i itdangiterba aser kuli kar sayuba nung injang aser artillery agütsü tanzükogo ta ashi.

Satellite noksa tem nung container 300 tashi North Korean rongnendak Nanjin nungi Russia anüdoklen Dunay-i September tetenzüklen yokba aser itemji ano Ukraine arütsülen Tikhorestk anasa military warehouse-i bener aoba sayu.

South Korea den rara metembangteti aliba mechi North Korea nung nok-nü jenti bendena lir. Linük ana ya technical tsütsübo tang tashi rara nung lir.

GOVERNMENT OF NAGALAND
DIRECTORATE OF INFORMATION TECHNOLOGY & COMMUNICATION
(Below New Secretariat) Thizama Road
Nagaland : Kohima 797001

No. DIT&C/Gen-76/2023

Dated Kohima, 19th October 2023

NOTICE INVITING E-TENDER

The Directorate of Information Technology & Communication invites e-Tenders from IT Empanelled Firms 2022 for conducting Security Audit of Websites & Applications and for new Software Development.

Interested bidders are requested to download the e-Tender Documents from www.nagalandtenders.gov.in and/or www.nagaland.gov.in. All Bids should be submitted only through the e-Tendering Portal, i.e. <https://nagalandtenders.gov.in> and bids submitted through any other means shall not be accepted.

Sd/-
(Er. Sabou Yashu)
Director

Gaza nem teyari agütsütsü Egypt-i melar

Tel Aviv, Mongputeni/Oct. 19 (Agencies): Israel-Hamas rara ajanga meimchir timtem ajurua aliba pongpadaktsütsü mechi Gaza nem teyari agütsütsü asoshi US Tir Joe Biden-i Egypt den tezüngzüktep ka yangluogo.

Tel Aviv semdanga mapang, Hamas-i amakba asoshi meyiper amaksü Israel dak temeden lir, ta Biden-i ashi.

Israel kanga mejungi timtem ajurur lir, ajisüaka mangyangtsü bilemba nem mokokdaktsütsüla ta US tiri ashi.

Mongulbarnü Gaza nung aliba mozüki ka nung bomb pokloktsüba ya Israel nunger tayimtsü amshia amakba ajanga masü ta Israel-i ashiba paia bhukuma liasü.

Gaza kübok Al-Ahli Arab Hospital nung bomb apokba nung nisung 471 takum sama ta Palestine ketdangtsü temi ashir aser Israel tenüng asener. Iba tatalokba yagi region nung tensa ano tamajungba kumdaktsü.

Ajisüaka iba lendong ataloker ghonda ti majungdang Bodhbarnü Tel Aviv semdanga mapang Palestine nunger rocket

meshidaki khaloktsüba nungi iba lendong ya atalok ta Israel-o ashiba Biden-ia bhukuma liasü.

Israel-i iba lendong atalokba nung Islamic Jihad dak tai tongloktsür, koba Gaza nung telungpur telok ka lir, ajisüaka Islamic Jihad-i iba lendong nung par shilem kecha mali ta ashir.

Iba ledong nung nisung asüba osang Palestine nunger sangdongba Israel-i magizüker. Foreign ministry odongtar Lior Haiat-i social media sapang X nung 'nisung ishika tepset dang mesüker' ta shia liasü.

Kidangi meyipa aodang Biden-i Gaza nung teyari agütsütsü asoshi Egypt Tir Abdul Fattah al-Sisi den phone ajanga jembia liasü.

Nüburtem nem teyari lorries (gari tulu) 20 shi nung bener Egypt nungi Gaza-i aitsü asoshi Rafah crossing lapoktsütsü Sisi-i molungogo, ta Biden-i osangbener dang ashi.

Egypt-ia par tir aser Biden tsüngta iba ken o jembiba shia liasü. Arütsü lapoktsü asoshi Biden-i mapang telatet magütsü saka anogo ishika tsüngta

lenmang tem yanglushir inyaktsü ta White House odongtar John Kirby-i ashi. Palestine nunger civilian tem yaritsü asoshi US-i sen million \$100 lemezüktsütsü ta Biden-i ashi.

Anogo ter tejakdang Israel-i Gaza tesem ajungalen shibangtsüba sülen nübürtem chiyongtsü, tajemtsü tzü, totzü, mozü aser danga nüngdakba osettem agi kanga anüngteper.

Palestine nunger telungpur telok, Hamas-i October 7 nü Gaza nungi ajungbena adoka nisung 1,400 tepsetba sülen Israel-i meyiper amaker.

Israel-i tayang kepzüka Gaza nung tayimtsü amshia bomb poklokja amakdang nisung 3,785 süogo, ta Palestinian health ketdangtsü temi ashir. Gaza nung alir Palestine nunger nisung million ka dak tema pei ki yutsür jena ogo.

Egypt nungi southern Gaza nung aliba civilian nem teyari oset bener otsüba nung Israel-i menokdangtsü ta Israel Ato Kilonser Benjamin Netanyahu-ia ashi.

Ajisüaka Hamas tem pua aliba

par nisungtem mechiok tashi par litsü alema teyari kecha meyoktsü ta Israel-i ashir. Nisung 200 junga pua bener oa lir ta ashir.

US tiri Tel Aviv semdanga mapang Netanyahu-i pelashishia agizük aser tena külemi osangbener den jembidang Hamas-i Israel amakba ya US nung 9/11 lendong mesüka lir ta Biden-i shia liasü.

Maneni Brehostibarnü UK Ato Kilonser Rishi Sunak-a Israel tonga aruogo. Sunak den külemi osangbener den jembidang, nai onok semdanga ajanga onok bhukumba sayur aser onoki kanga pela agizüker, ta Israel Ato Kilonser Benjamin Netanyahu-i ashi. Küm 80 tejakdang British nungeri Nazis den rara aser Hamas ya Nazis tasenba lir, ta pai UK ato kilonser dang ashi.

Ibai Israel indang tongpang kisüng masü saka 'civilised, free world aser modern Arab' linüktem rara lir, ta Netanyahu-i nenshia ashi.

Külen alirtemji temenen telok lir aser yangji Hamas, Hezbollah aser Iran dena lir ta pai ashi.

Iba tongpang ya talang asütsü

aser nenok teyari maneni nüngdaktsü. Yangi takok aser tamakok alitsü. Yangi nübürtem lungjemer lir aser onoki aji nüngdaker, ta paisa ashi.

Israel küm aika azüdokshi aser kiralongra agi sünger lia aruogo. International law den apet Israel indang temeden kumzüka ayutsü raraba nung UK-i bhukumer, ta Ato Kilonser Rishi Sunak-i ashi.

Israel-i Hamas kiralongrar den raradang civilian nem timtem magütsütsü mera ajak agir ta ni meteta lir, ta Sunak-i ashi.

Palestine nunger civilian tem ya Hamas-isa tepseter aser Gaza Strip telungi teyari yoktsü Israel-i telemtetba agiba pela agizüker, ta pai ashi.

Region nung UK-i teyari timba agütsütsü aser akok tashi tekeraba nung nübürtem nem teyari agütsütsü merangtsü.

Ner tembar ama Israel tammang tia nung ni yangi nüdek külem tejak tenteta nokdaker. Tarutsü nunga nenok den nokdaktsü aser nenok nem takok ngudaktsüner, ta UK ato kilonseri ashi.

5buba Tetsür basketball asayamung tenzükogo



Kohima, Mongputeni/Oct 19 (TYO): Anogo asem asayatsü aliba 5buba tetsür Basketball asayamung Brehostibarnü Loyola Higher Secondary School, Jakhama, Kohima district nung tenzükogo.

Iba asayamung ya Vision Trinity Club (VTC)-i ayongzük aser Nagaland aser Meghalaya nungi team teneti shilem agidar.

Team tem rongnung All Blacks, TMB, Loyola HSS, Aces, Japfu Christian College aser Touchline Basketball Academy, Shillong densema lir.

Brehostibar aser Hokolbarnü league asayatsü aser knock-out o final asaya Honibarnü asayatsü.

Asayamung lapokba sentong nung o jembiba

mapang Academy Dimapur Proprietor aser Principal Sashila Ozukum-i ashiba agi, iba asayamung ajanga tetsürtem empowerment, sportsmanship aser lokti-i shilem agiba tali jangja metetdaksü.

Asayamung ajanga tetsürtem nem tali tashi agütsütsü asoshi mernger ta shi lai, saisapong ya tetsürtem empowerment aser pei sasadak temulung lemteta akümba, yimya yimpong aziökba aser lensüba amala yimyattem asoshi koda tongtibang lir iba ya ngua kanga pelar, ta ashi.

Iba asayamung ya tetsürtem atema saisapong nung parnok sempet aser tashi sayutsü atema tongtibang sabang ka lir, ta lai ashi.

Maneni lai asayamung nung shilem agirtem dang court nung dang masü saka taküm nunga inyakyim ajak nung tajungtiba agütsütsü ajungshia liasü.

Kasa mapang nung Project Director of Task Forces for Music and Arts, Dr Hovithal Sothu-i, iba asayamung indang trophy tasenba sayaja liasü.

Asayamung lapokba sentong ya VTC speaker Tshelulhi Thopi lenisüba nung agi aser Loyola HSS Jakhama Rector & Principal Rev Fr Pravin Solanki-i sarasademer tenzük. Sentong nungsa VTC tir Nunese Sale-i tajungshi o tatsüka jembi aser VTC sports secretary Luokepzo Joshua-i achaayanga asayartem tenangzüktepba agia liasü. Grace Dogmai-i ken tajung ka tena lokti ayonzüka liasü.

Goa nung National Games tenzükogo

Mongputeni/October 19, 2023 (Agencies): Brehostibarnü Badminton 37buba National Games tenzükogo. Iba asayamung formally metenzük tsungda Badminton asayamungbo tenzükogo.

Brehostibar anepdang Dr Shyama Prasad Mukherjee Indoor Stadium nung Badminton asayamung lapokba sentong nung Chief Minister Pramod Sawant, Sports Minister Govind Gaude aser tanga ketdangsürtemi shilem agia liasü.

37buba National Games ya Ato Kilonser Narendra Modi-i October 26 nü Goa nung nikongtsütsü 6:30 ako nung formally tenzüktsütsü.

"Iba asayamung ayongzüktsü atema onoki küm ter tashi nukjidong yur aruogo

aser iba atema kanga meranga inyakogo. Taküm National Games ya kanga takok ngua asayatsü. Tarutsü nung Asian Games, Commonwealth Games aser Olympics nung asayartem temaba jenjang tongtettsü atema iba ya sabang tajung ka asütsü imlar," ta Sawant-i ashi.

"Goa ya tziyim aser lisem atema kanga nungtugu lir, ajisüaka onoki saisapong nunga kasaji jangjadaksüner," ta pai ashi.

Kasa mapang nung Govind Gaude-i, Ato Kilonser Narendra Modi nukla tulu lir ta shia asayar ajak dang saisapong nung India tejakdangi anitsü ajungshia liasü.

"Iba dak sendakba nung onoki 37buba National Games Goa ayongzükogo. Iba asayamung ya kanga takok ngua agitsü ta onoki temulung lema bilemer," ta pai ashi.

Hazard-i asaya nungi anentsü telemtetba agiba kuli agütsü



Mongputeni/October 19, 2023 (Agencies): Taoba mapang Chelsea nungi nungtugu asayar Eden Hazard, shibai arishi küm 32buba nung tawa football asaya nungi anentsü telemtetba agiogo, pai pa kanga kara asaya nungi anenba indang kuli agütsüogo.

Pa tanur asüdag Stamford Bridge-i aru aser pa sempet ajanga ajak atsüa aru aser Chelsea nungi küm tenet (2012-2019) asayaba mapang takok tajung ngutetogo.

Belgium nunger asayar yagi Chelsea nungi asaya 352 nung shilem agiba mapang goal 110 idaktsü aser assist 92 süja liasü. Maneni pa Chelsea nungi asayaba mapang England nung asayamung ajak kokogo. Pai Premier League ana, Europa Leagues ana, FA Cup aser League Cup kokogo.

2019 küm pai Real Madrid-i aotsü atema telemtetba agia liasü. Ajisüaka Eden atema tia maka Madrid nungi asayaba mapang aiben yiru aser junga masayateti liasü.

Taküm Real toktsüba sülen

Eden-i taoba hopta asaya nungi anentsü atema telemtetba agiogo.

"Ni asayaba moapu nung kodang jangradema masayadir iba mapang asaya toktsütsü ta shia aruogo. Ni sen atema tanga tesem kari oa masayaner," ta pai L'Avenir dang ashi.

"Iba ya telemtetba tajungtiba liasü. Ni joko training maginer aser ni asayatsü asoshia maongka mongui liasü. Telemtetba kanga tongmelang liasü.

"Taküm nung tatalokba ajabo rasa meshiteter. Ni yimjung nung lir aser kanga pelar. Football asaya nungi anener ni tinyaktsü aika lir aser iba ajanga ni telemtetba agitetogo," ta pai ashi.

Hazard ya Madrid toktsür Saudi Pro League nung oa asayatsü ta bilema liasü, kong Cristiano Ronaldo, Karim Benzema aser Neymar nunger amala nungtugu asayartem asayadar. Ajisüaka Belgium nunger asayar yagi asaya nungi anentsü atema telemtetba agiogo.

MKG nung 26buba inter-district & state TT championship asayatsü



Mokokchung District TT Association-i ayongzüka 26th Inter-District & State TT Championship asayatsü aliba dak sentakba nung osangbener senden akadang tangokba noksa nung angur. Mokokchung, 19th October, 2023.

Mokokchung, Mongputeni/October 19 (TYO): Nagaland Table Tennis Association aküm nung Mokokchung District Table Tennis Association-i ayongzüka 26buba inter-district & state table tennis championship yangi Multi-Purpose Sports Complex, Mokokchung nung 23rd Oct nungi 26 Oct tashi asayatsü sentong renema lir, ta Oct 19 nü organizing committee convener, Aosunep aser MDTTA tir, Ali Walling nati 'Nine Ten Restro' nung osangbener den jembidang metetdaksü.

Taküm iba asayamung nung Nagaland nung aliba district 12-tayonger district Mokokchung densema Phek, Longleng, Wokha, Kiphire, Samator, Zunheboto, Mon, Dimapur,

Kohima, Nuiland aser Chümoukedima district-temi shilem agitsü jangjaogo, ta tayongertemisa metetdaksü.

Iba asayamung nung district team events (Men & Women) alitsü aser open category nung sub-junior under 13 (boys & girls) - single, junior under 15 (boys & girls) - single, under 19 (boys & girls) - single & doubles, mixed doubles, sub-veteran 40+ - single & doubles aser veteran 50+ - single, ta asaya telemsaji alitsü, ta parnokisa metetdaksü.

Iba asayamung nung asaya telemsa balala nung takokertem nem senpet sen den kuli kaket agütsütsü asoshi Nagaland Table Tennis Association-i renemtsütsü, ta parnokisa ashi.

Iba asayamung nung asayar

aikati shilem agitsü onoki imlar aser tanga district nungi arurtem aser nungdakbapurtem ajak asoshi tamungdak, chiyungtsü aser nungdakbatem tayongertemisa anepalutsütsü, ta parnokisa shiogo. Iba dak sentakba nung nungdakbapuri MDTTA tir - 9436439033 den tongteprateptetsü.

TT, saisapong meimer aser tejangrar ajak iba asayamung nung pela shishia jaoker, ta tayongertemisa metetdaksü.

Iba asayamung tenzükba sentong 23rd Oct nü nikonngang 4:00 ako nungi tenzükba Multi-Purpose Sports Complex nung akatsü aser sentong nung Information & Public Relations, Soil and Water Conservation Advisor, Imkong L. Imchen chief patron asütsü jaoka lir.

BILEMDANGANG
"Tamakok medeni takok angutsü tamakoktsü."